

18.01.2009
DOMENIE II «VIE PAL AN»

Antifone di jentrade Sal 65,4

Denant di te si plee dute la tiere
e al to non e cjante, o Altissim.

Colete

Diu onipotent e eterni,
che tu rezis tant lis robis dal cîl che chêis de tiere,
scolte cun boncûr lis preieris dal to popul
e regalinus la pâs ai nestris dîs.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Sam 3,3-10.19

Fevele, Signôr, che il to famei ti scolte.

Da prin libri di Samuel

In chei dîs, Samuel al jere lât a pognisi tal santuari dal Signôr, là ch'e jere l'arcje di Diu. Il Signôr al clamà: «Samuel!» e lui al rispuindè: «Ve chi ch'o soi!». Al le di buride di Eli e i disè: «Ve chi ch'o soi, che tu mi âs clamât». «Jo no ti ai clamât gran – dissal Eli –; torne a durmî». E lui al tornà a durmî. Il Signôr al tornà a clamâ: «Samuel!». Lui al jevà sù e al le di Eli e i disè: «Ve chi ch'o soi, che tu mi âs clamât». «Jo no ti ai clamât, fi gno – dissal Eli –; torne a durmî». Samuel nol cognosseve ancjemò il Signôr e la peraule dal Signôr no i jere stade nancjemò no rivelade. Il Signôr al tornà indaûr a clamâ Samuel pe tierce volte. Lui al jevà sù e al le di Eli e i disè: «Ve chi ch'o soi, che tu mi âs clamât». Alore Eli al capì ch'al jere il Signôr ch'al clamave il frut e i disè a Samuel: «Va a durmî e, se ti clamin, tu âs di dî: Fevele, Signôr, che il to famei ti scolte» e Samuel al tornà a pognisi inte sô cove.

Il Signôr al rivà e si fermà. Al clamà compagn di chei altris viaçs: «Samuel, Samuel!» e Samuel i rispuindè: «Fevele, che il to famei ti scolte».

Samuel al cresseve in autoritât. Il Signôr al jere cun lui e nol lassà colâ abâs nuie di ce che i veve dit.

Peraule di Diu.

SALM RESPONSORIÂL dal Salm 39

R. Ve chi ch'o soi, Signôr, par fâ la tô volontât.

O ai metude tal Signôr dute la mî sperance,
lui si è pleât viers di me
e al à scoltât il gno berli.
Al à metût su la mî bocje une cjante gnove,
une laut al nestri Diu. **R.**

Tu no tu bacilis par sacrificis e par ufiertis,
tu mi âs vierzût pulît lis orelis!
Oloauscj e sacrificis pal pecjât no tu domandis.
Alore o ai dite: «Ve chi ch'o soi! **R.**

Al è scrit sul gno cont tal rodul dal libri
che la tô volontât o fasi.
Sì, Diu gno, o vuei fâle:
la tô leç le ai dentri vie». **R.**

O conti la tō justizie te grande semblee.
Ve, jo no ten sierâts i miei lavris:
tu tu lu sâs, Signôr. **R.**

SECONDE LETURE 1 Cor 6,13-15.17-20

I vuestris cuarps a son parts dal cuarp di Crist.

De prime letare di san Pauli apuestul ai Corints

Fradis, il cuarp nol è pe sporcjetât ma pal Signôr, e il Signôr al è pal cuarp. E Diu, ch'al à resussitât il Signôr, nus resussitarà ancje nô cu la sô potence.

Po no savêso che i vuestris cuarps a son parts dal cuarp di Crist? Alore cjaparaio sù lis parts di Crist e lis fasaraio deventâ lis parts di une sdrondine? Ma vie po! Ma chel che si da dongje cul Signôr al devente un spirt sôl cun lui. Stait lontans de sporcjetât! Ducj i pecjâts che l'om al fâs a son fûr dal cuarp; ma chel ch'al fâs porcaris al pecje cuintri dal so cuarp. Po no savêso che il vuestri cuarp al è il santuari dal Spiritu Sant ch'al è in vualtris, che lu vês di Diu e che no si partignîs? O sêts stâts comprâts a cjâr presit. Alore glorificait Diu tal vuestri cuarp!

Peraule di Diu.

CJANT AL VANZELI 1Sam 3,9; Zn 6,68

R. Aleluia, aleluia.

Fevele, Signôr, che il to famei ti scolte.

Dome tu tu âs peraulis di vite eterne.

R. Aleluia.

VANZELI Zn 1,35-42

A vioderin là ch'al jere a stâ e in chê dì si fermarin li di lui.

Dal vanzeli seont Zuan

Tal indoman, Zuan al jere ancjemò li cun doi dai siei dissepui. Butant il voli su Gjesù ch'al passave, al dîs: «Ve l'agnel di Diu». I doi dissepui lu sintirin a fevelâ cussi, e a lerin daûr di Gjesù. Gjesù, voltantsi e viodint i doi dissepui che i levin daûr, ur dîs: «Cui ciriso?». I diserin: «Rabi (ch'al vûl dî 'mestri'), dulà stâstu?». Ur dîs: «Vignît e o viodarê». A lerin e a vioderin là ch'al jere a stâ e in chê dì si fermarin li di lui. A jerin tor lis cuatri dopomisdì.

Andree, fradi di Simon Pieri, al jere un di chei doi ch'a vevin scoltât Zuan e a jerin lâts daûr di lui. Al cjate par prin so fradi Simon e i dîs: «O vin ciatât il Messie (ch'al vûl dî 'Crist')». Lu menâ li di Gjesù. Cjalantlu fis, Gjesù i disè: «Tu tu sêts Simon, fi di Zuan. Tu ti clamarâs Chefa (ch'al vûl dî 'Pieri')».

Peraule dal Signôr.

Su lis ufiertis

Danus la gracie, Signôr,
di celebrâ chescj misteris dispès e cun fede,
parcè che ogni volte che si fâs memorie di chest sacrifici
si colme la vore de nestre redenzie.

Par Crist nestri Signôr.

Antifone a la comunion Sal 22,5

Tu prontis denant di me une taulade
e il gno bocâl al è plen ch'al stranfe.

O ben: 1 Zn 4,16

Nô o vin ricognossût e crodût al amôr che Diu al à par nô.

Daspò de comunion

Met in nô, Signôr, il spirt dal to bonvolê,
par che, sostentâts cul unic pan dal cîl,
o sedin unîts intun unic amôr.
Par Crist nestri Signôr.